

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

In colaborazion cun Fidas Isontina

"Vê cure", la culture dal volontariât e partis des scuelis

Di dulà nassie la culture dal volontariât in Friûl? Parcè covential doprà une part dal nestri timp par chei altris?

Cemût si puedial insegnâ ai zovins a diventâ citadins cussients de impuartance dal "vê cure", par stâ ben cu se stes e fâ dal ben a di chei altris?

La Societât Filologjiche Furlane, a mieç dal Docuscuele, il Centri regionâl di documentazion, ricercje e sperimentazion didattiche pe scuele furlane - e à inviât un percors, clamât juste apont "Vê cure", par capî cemût che e funzione cualchidune tra lis realtâts plui impuartantis dal Friûl, cun chê di sburtâ al dialic e creâ ocasions di scambi tra il mont de scuele e chel dal associazionisim. Lis ativitâts a son stadis realizadis cul finanziament de Region Autonome Friûl Vignesie Julie, cun risorsis dal Ministeri dal lavôr e des Politichis sociâls, cu la colaborazion de Protezion Civîl e il patrocini dal Ufici Scuelastic Regionâl, in partenariât cun cetancj ents dal Tierç Setôr: la associazion pe Costituzione di S.

Un progjet inviât dal Docuscuele cun chê di sburtâ il scambi tra il mont de istruzion e chel dal associazionisim

Denêl, chê dai Donatôrs di Sanc FIDAS Isontina di Gurize, Reset di Tumieç e cetancj istitûts comprensîfs. Te prime fase a son stâts selezionâts 20 docents par un cors di alte formazion su la metodologjie CLLIL (Content and Language Integrated Learning) aplicade ai setôrs di ativitât dai sogjets partner, ven a stâi il volontariât, il benstâ e la Costituzione, cul obietîf di realizâ unitâts didattichis specifichis, doprant il furlan tant che lenghe veicolâr.

In plui de formazion specifiche, al è stât fat un cicli di seminaris tai mès di Avrîl e di Mai. I temis tratâts a son stâts la storie de Costituzione taliane, i articui fundamentâi e i dovês dai citadins, cu la associazion "Per la Costituzione A.P.S."; la Protezion

Civîl che, in plui di une introduzion su la sô storie e la sô ativitât, e à viert lis puartis de sede di Palme (te foto) par une visite dentri de Centrâl Operative regionâl, che propit in chei dîs e jere impegnade inte gjestion de emergjence in Emîlie-Romagne; la Associazion Donatôrs di Sanc FIDAS Isontina e à presentât il fassicul didatic rincurât di Anna Zossi sul benstâ e la cure de persone.

Tal prossim an scuelastic si fasaran laboratoris intes scuelis e si metaran in vore i percors didattics prontâts dai docents, che a jentraran intun dai "Cuaders dal Docuscuele".

Par finî, i risultâts a saran presentâts al public cun incuintris che si fasaran in diversis localitâts dal Friûl.



Il grop al à visitât il borc dal Cjascjel, il Museu de Grande Vuere e Cjasa Ascoli

Fogolâr Furlan di Milan: une bieles visite a Guriza



VINARS AI 21 DI LUI E JE VIGNUDE A CIATÂNUS UNE DELEGAZION DI AMIS DAL FOGOLÂR FURLAN DI MILAN, CU LA PRESIDENTE ELENA COLONNA. A MATINE IL GROU, COMPAGNÂT DAL DIRETÔR DE FILOLOGJICHE FELICIANO MEDEOT, AL À VISITÂT IL BORC DAL CJASCJEL E IL MUSEU DE GRANDE VUERE. DILUNC DE VISITE SI À PRESENTADE LA STORIE DE CITÂT DAL PRIN DOCUMENT DAL 1003 FIN IN DÌ DI VUÊ, CUN PARTICOLÂR ATENZION AL NÛFCENT: LA PRIME VUERE DAL 1915 AL 1917, CU LIS BATAIIS TAL DULINTOR DI GURIZA E PE CONQUISTE DE CITÂT TAL AVOST DAL 1916; LIS CUISTIONS SUL CONFIN ORIENTÂL PRIME E DOPO LA SECONDE VUERE MONDIÂL. TAL DOPOMISDI LA DELEGAZION E JE STADE A CJASA ASCOLI, SEDE GURIZANE DE FILOLOGJICHE, INDULÂ CHE E À VISITÂT LA MOSTRE "LIS LENGHIS DI GURIZA", LA ESPOSIZION CHE E SPIEGHE CEMÛT CHE LA CITÂT DI GURIZA E MERETE DI JESSI IN PARIE CUN GNOVA GURIZA CAPITAL EUROPEANE DE CULTURE PAL 2025. CHESTE MOSTRE PERMANENTE, CHE DUCJ A PUE DIN VISITÂ CUAUT CHE E JE VIERTE LA SEDE, E PRESENTE NO DOME LA VITE E LA OPERE SIENTIFICHE DI GRAZIADIO ISAIA ASCOLI, PARI DAI STUDIIS DI GLOTOLOGJIE E DI LENGHISTICHE COMPAREDE IN ITALIE, CHE LA FILOLOGJICHE I È INTITULADE, MA ANÇE LA SITUAZION ETNOLENGHISTICHE DAL GURIZAN, LA SOLE AREE IN DUTE EUROPE LI CHE TAL CORS DE STORIE - FIN A LA CONCLUSION DE PRIME VUERE MONDIÂL - A ÂN VIVÛT INSIEMIT LIS COMUNITÂTS TALIANE, SLOVENE, FURLANE, TODESCJE E EBRAICHE: PROPIT INTE PLURALITÂT DES TRADIZIONS E DES LENGHIS, LA CITÂT DI GURIZA E CJATE IL VÉR CARATAR DISTINTÛF DE SÔ IDENTITÂT. CJASA ASCOLI E JE VIERTE AL PUBLIC DI LUNIS A JOIBE CUN ORARI 10 - 12.30 E 15.30 - 18. E DI VINARS DOME LA BUINORE DA LIS 10 A MISDI E MIEÇ.

Events d'Istât tal Gurizan

Tantis lis manifestazions culturâls tal Friûl di soreli jevât

Ançe in Istât a son tantis lis manifestazions culturâls tal Friûl di soreli jevât, organizadis su iniziative o cu la poie de Societât Filologjiche. Si tache vinars ai 28 di Lui a lis vot e mieze di sere tal parc de Fondazione De Senibus a Uanis di Dael cu la presentazion dal volum "Côr la flumera granda" di Renato Iacumin. Il professôr Ferruccio Tassin, che al à ançe

rincurât la publicazion, al presenterà il libri e la opere di Renato Iacumin (1941-2012) inteletuâl di Aquilea, insegnant e poete, une vore impegnât ançe te politiche. Joibe ai 10 di Avost a lis sis sot sere te glesie di San Lurinc dal Lusinc, in ocasion de Messe pal patron dal paîs celebrade di bons. Carlo Roberto Maria Redaelli, Arcivescul di Guriza, la "Coral di San Lurinz Don Nino Bearzot", direzude di Raffaella Visintin, e cjantarà pe prime volte te version polifoniche la "Messe Eucaristiche" di Gabriele Saro.

La Messe e je stade presentade la prime volte pal Congrès dal Centenari da la Filologjiche, tal 2019 a Madone des Graciis a Udin, cjantade de corâl "Artemia" dal Tor di Zuin te version par vòs blancje e duncje voltade, simpri dal compositor Gabriele Saro, a plui vòs e publicade a la fin dal 2022.

Par finî, joibe ai 11 di Avost, inte suaze de Sagre di San Roc a Guriza, a lis sis sot sere Roberto Zottar al intervistarà Carlo del Torre - autôr dal libri su la cusine des dimoris storichis furlanis - su lis ricetis tradizionâls dal Gurizan.